


Te Tauraka Waka o Māui



He kupu hei whāngai i te tamaiti

Maitahi
Māui
Kā Tiritiri o te Moana
Mako-horopekapeka
Mako-tipua
Tiheimauriora
Mahunui
Heretaniwha
Whenua
māeroero
patupaiarehe
hauhau(a)
kōrekoreko
pata onepū
taukapokapo
uta(ina)

Kā kupu o Kāi Tahu

ikoa	ingoa
kahuraki	kahurangi
kahere	ngahere
kōkikōki	ngōkingōki
kau	ngau
rika	ringa
ruka	runga
tōhona	tōna
toka	tonga
whaka	whanga



Ka rere tonu te waka o Māui, ka tae ki Maitahi.
Kōrekoreko ana Kā Tiritiri o te Moana i kā hihi o te rā, me te kānapanapa mai anō o te manomano karu o kā kahere



Tērā ētahi makō nunui e tūtei ana i te whaka, ko Mako-tipua rāua ko Mako-Horopekapeka. He māeroero, he patupaiarehe e titiro mai ana i te kahere. Ka puta mai te tini o kā manu me kā kōkikōki o Poutini ki te Toka kia kite ko wai kā tauhou kua tae mai ki tō rātou ao.



Ka mahi a Mako-tipua ki te kau i a Mahunui, kia mataku ai a Māui, kia rere.



Ka mau te rika o Māui ki tana toki, a Tiheimauriora, ka hauhau a Mako-tipua.



Ka hauhau hoki a Mako-horopekapeka, ā, ka herea rāua ki tētahi taura tapu.



Ka tōia rāua ki tua o te waha o Maitahi, ka herea atu ki te mātārae i te pito toka o te whaka. Tapaina ana taua wāhi ko Heretaniwha.



Kua pai ināianei tā Māui ū ki uta i Maitahi.
Taukapokapo ana te tāhuna i te kōura o kā pata onepū, kānapanapa ana i te kahuraki o te Aotea.



Me te kai – inā kē te nui! Ka roa a Māui me ana kaumoana ki Maitahi.



Ka taka te wā, ka pupū ake anō te hiahia o Māui ki te kimi whenua hou. Ka utaina kā mea e rite ana ki ruka o Mahunui, ka rere anō te tira a Māui ki te toka.